

նա, եթե երկար այնտեղ կմնա...: Երեսին գոյն չես տեսի, օրինակ քեզ կտա... Ախ, Սուսանը էլ շատ չի ապրի, թե «նրա» գլխին փորձանք կգա...

Պառաւը այլեւս չկարողացաւ խօսքը շարունակել, սկսեց դառն կերպով լաց լինել: Արտասուքը աւելի նսեմացրեց նրա աչքերի լոյսը: Ես աշխատեցի մխիթարել նրան: Երբ մի փոքր հանգստացաւ, հարցրի, ինձ բաւական մօտեցած համարելով գաղտնիքի իսկութեանը.

– Ինչպէ՞ս դու մտար «նրա» մօտ:

– Ինչպէ՞ս մտար... – կրկնեց պառաւը հեզնական կերպով եւ նրա ցամաք դեմքի վրայ վազեց մի վայրենի ծիծաղ: – Սուսանի ճանապարհը ո՞վ կարող է կտրել: Սուսանը ամէն տեղ մուտք ունի: Թե խանի ամրոցի, թե աղքատի խրճիթի դռները նրա առջեւ բաց են: Սուսանը կարողում է մարդերի ճակատագիրը. Սուսանը գուշակում է նրանց չան ու բարին: – Տու՛ր ինձ ձեռքդ, գուշակեմ քեզ համար...

Կարծես նա մոռացաւ առաջին տխուր զգացմունքը «խեղճ աղջկաւ մասին. կարծես, նա մոռացաւ, որ Կարօյի հետ էր խօսում: Այժմ տիրեց նրան այն, ինչ որ բոշայական էր, ինչ որ վայրենի էր: Նրա առաջին արտասուքը եւ վերջին ծիծաղը մի ընկալում այնպէս փոփոխակի կերպով յաջորդեցին միմեանց, որ պարզ երեւաց, թե ողորմելի կինը ցնորոած էր:

– Լաւ, այդ յետոյ, թող մնայ գուշակելը, – պատասխանեցի ես: – Դու այն ասա՛, թե ե՞րբ տեսար «նրան»:

– Սուսանը մտաւ ամրոցը, երբ առաւօտեան ցօղը դեռ չէր բարձրացել խոտերից. աղախինները վազեցին նրա առջեւը, «եկ, մեզ համար գուշակի՛ր, Սուսան», ասեցին. յետոյ տարան...

Պառաւը չաւարտեց իր խօսքը: Սոյն միջոցին միևարեթի դռնից երեւաց Կարօյի գիշերային անթնութիւնից գունաթափոած դեմքը: Պառաւը մի խոժոռ հայեացք գցելով իմ վրայ, իսկոյն թողեց ինձ, ասելով.

– Դու Կարօն չես. դու խաբեցի՛ր Սուսանին...

Նրա խռովեալ ձայնի մէջ կար ե՛ւ սպառնալիք, ե՛ւ բարկութիւն:

– Միեւնոյն է, նա իմ եղբայրն է, Սուսան, – հանգստացրեց Կարօն, մօտենալով պառաւին:

Նրանք առանձնացան մի կիսաւեր պատի ետեւի կողմը, եւ երկար կանգնած խօսում էին ինձ անլսելի ձայնով: Պատի վրայ բուսած մացառների խտութիւնը դեռ չէր արգելում նրանց իմ տեսութիւնից: Կարօն գլուխը քարշ գցած, լսում էր: Պառաւը ինչ որ պատմում էր նրան: Ես այժմ մասամբ հաս-